


五代會要

			漢書門
	二四	二八	類
一	一	二	號
六	四	八	函
冊	架	函	冊



子孫永保
共十六卷
藏書煙家記

內閣文庫	
元	二
四	四
一	一
六	六
架	冊
漢	書

內閣文庫	
番號	漢 2428
冊數	16 (16)
函號	294 26

廿九三十止



五代會要卷二十九

宋 王

溥 撰

契丹

契丹本鮮卑之種也居遼澤之中潢水之南遼澤去
榆關一千一百二十里榆關去幽州七百一十四里
其地東南接海東際遼河西北包冷陁北界松陁山
川東西三千里地多松柳澤饒蒲葦其族本姓大賀
氏後分爲八部一曰旦利皆部二曰乙室活部三曰
實活部四曰衲尾部五曰瀕沒部六曰內會雞部七



曰集解部八曰奚嗚部管縣四十一每部有刺史每縣有令酋長號契丹王唐制兼松漠府都督幽州置松漠府長史一人監之其後諸姓不常唐會昌中幽州節度使張仲武表其王屈戌請賜印篆爲奉國契丹之印其八族長皆號曰大人稱刺史內推一人爲王建旗鼓以尊之每三年第其名以代之唐末有邪律阿保機者恃強好勇不受諸侯之代吞侵隣部兵力漸盛嘗與後唐太祖會盟於雲中結爲兄弟其後僭稱帝號以妻述律氏爲皇后燕人韓延徽爲宰相

法令嚴明諸部皆畏伏之

梁開平元年四月遣其首領袍笏梅老等來貢方物至二年二月其主阿保機又遣使來貢良馬五月又遣使解里貢細馬十疋金花鞍轡貂鼠皮裘并冠男口一年十歲名曰蘇女口一年十一歲名曰譬其妻述律氏貢朝霞錦前國王欽德并其大臣皆有貢獻太祖命司農卿渾持右千牛衛將軍郎公遠充使就本國宣諭

三年閏八月又遣首領葛祿來貢方物太祖御文明

殿召葛祿等五十人張讌賜金帛有差至五年四月
又遣使實柳梅老來朝貢

後唐同光二年三月阿保機率所部入寇新城其年
七月又率兵東攻渤海國至九月爲鄰部室韋女貞
迴鶻所侵十二月又入寇嵐州三年二月復入寇幽
州爲王師所敗俘其首領衢多等其年五月又遣使
拽鹿孟^孟等來貢方物

四年正月阿保機復寇渤海國又遣梅老鞋里已下
三十七人貢馬三十匹詐修和好

天成元年九月攻渤海國扶餘城下之命其長子突
欲爲國主號東丹王其月二十七日阿保機得疾而
死第二子元帥太子德光嗣立德光本名曷屈之慕
中國之名故改爲德光初阿保機有三子長號人皇
王次號元帥太子次日安端少君及阿保機死其妻
述律氏令第二子元帥太子德光勾當兵馬令少子
安端少君往渤海國代突欲將立爲嗣而元帥太子
素爲部族所敬又其母述律氏亦常鍾愛故因而立
之僞稱天顯元年尋葬阿保機於西樓

番中地名 僞謚大

聖皇帝其年十月遣使設骨餒來告哀明宗輟其月十九日朝參以禮之其月僞平州守將領幽州節度使盧文進率戶口兵馬車帳來降至二年十一月又遣使梅老等二十餘人朝貢兼申和好之意明宗命飛勝指揮使安念德齎錦綺綾羅及金花銀器寶裝酒器等賜之又賜其母述律氏繡被一張并寶裝瓔珞至三年正月復入寇陷平州而去至其年五月定州節度使王都叛命潛相連搆其王德光遣首領禿餒率襍虜數千騎入定州至七月又遣首領惕憐等

率七千餘騎來援尋爲行營招討使王晏球等逆戰破之勦戮甚衆餘黨復爲幽州節度使趙德鈞襲之殺獲殆盡擒其首領惕憐等其月王晏球又獲契丹絹書二封來進明宗命宣示羣臣莫有識其文字者契丹本無文記唯刻木爲信漢人陷番者以隸書之半就加增減撰爲胡書同光之後稍稍有之其年八月幽州部送所獲番將惕憐已下六百餘人至京師明宗皆赦之選其尤壯健者立爲契丹直其首領皆賜姓吉時言事者以爲胡人悻戾不可置於君側俄

而有首領吉趙實自京遁歸奪船過河至深州捕獲
斬之至其年閏八月僞平州刺史張希崇來降四年
三月定州行營招討使王晏球擒禿餒等二十餘人
獻於闕下悉命戮之

長興元年十一月契丹渤海東丹王突欲率番官四
十餘人馬百匹自登州泛海內附明宗御文明殿召
對及其部曲慰勞久之賜以衣冠金玉帶鞍馬錦綵
器物等突欲進本國印三面宣示宰臣其年十二月
中書門下奏契丹國東丹王突欲遠泛滄溟來歸皇

化請賜姓名仍准番官入朝例安排謹按四夷入朝
番官有懷德懷化歸德歸化等將軍中郎將名號又
本朝賜新羅渤海兩番國主官初自檢校司空至太
保今突欲是阿保機之子請比新羅渤海王例施行
敕渤海國王人皇王突欲契丹先收渤海國改爲東
丹其突欲宜賜姓東丹名慕華授光祿大夫檢校太
保安東都護兼御史大夫上柱國渤海郡開國公食
邑一千五百戶充懷化軍節度瑞慎等州觀察處置

押番落等使

二年九月復姓李名贊華三年五月授滑州節度使爲廢帝所殺


至二

年其契丹王母述律氏以其子突欲歸國遣使朝貢
明宗深慰納之至三年三月禮賓使梁進德自契丹
報聘迴稱其王請放薊刺舍利還本國
薊刺亦定州所獲番將也
又請去年十二月十二日其王帳前有大星晝隕聲
若雷震其月又遣使鐵葛羅卿進馬三十疋亦以放
薊刺歸國故也五月鐵葛羅卿迴明宗欲放薊刺等
令歸大臣爭之未決會幽州節度使趙德鈞上表論
奏及易州刺史楊檀皆言不可遣其事乃止仍遣薊
合骨利隨其使歸不欲全阻其請也其年七月又遣

使都督述祿進馬三十疋

清泰三年五月晉高祖起義於太原九月官軍集於
城下晉乃間道發使召德光爲援是月德光率部落
五萬餘騎至太原城下尋敗招討使張敬德楊光遠
之兵降晉安大砦

晉天福元年十一月高祖踐位以德光有援助之力
歃血爲盟結爲父子仍約歲輸絹十三萬匹割鴈門
已北及幽州所屬縣並隸番界德光又率兵逐高祖
於潞州繫幽州節度使趙德鈞并其子樞密使趙延



壽而迴三年二月德光遣使子解里舍利梅老來聘
三年十月又遣使來上尊號曰英武明義晉祖繼命
宰臣馮道趙瑩劉昫等齎貨珍幣歲時進貢不絕德
光亦遣名王來至六年六月節度使安重榮執契
丹使拽刺等以輕騎掠幽州之南界高祖累遣中使
齎詔開諭以契丹有助立之功不欲負其宿約而重
榮奸險肆志竟誅拽刺等馳檄天下言契丹之罪惡
與襄州節度使安從進連謀不軌高祖命杜重威率
兵討之至貝州宗城縣相遇重榮之衆大敗至七年

正月二日收復鎮州斬重榮首漆之送於契丹至其
年四月高祖不豫少帝嗣立五月遣使郎五來致吊
兼獻衣服鞍馬等至十月又遣使大卿已下二十六
人來聘以高祖山陵有日致祭故也至九年正月德
光遣趙延壽趙延照等率兵五萬入寇貝州少帝發
兵屯守澶州初青州節度使楊光遠構逆謀乃繕治
城隍蓄聚芻粟爲跋扈之計屬歲不稔餓殍相繼朝
廷以廩帑虛竭軍用不給仍發使郡縣括借民家資
財斛斗海內嗷嗷不堪其命光遠遂以重利誘德光

入寇又以趙延壽等皆中原人士常有思歸之意冀
羣勾盜國晉祚不濟則天福在已其月德光自河間
率諸部兵入犯甘陵陷之巡檢使吳蠻投井而死河
北大擾少帝駐蹕澶州命宋州節度使高行周等將
兵以禦之三月德光自領襍虜十餘萬來攻戚城官
軍拒之而退又以趙延壽行魏博節度使改封魏王
以延壽門人高融爲節度副使統步奚及燕軍數萬
營於南康四月又陷德州博州其年十二月德光又
率衆南下攻圍鎮州諸邑皆陷之

開運二年二月前鋒至邢州鎮州節度使杜重威差
人間道告急少帝欲親率大軍渡河決戰乃命軍州
節度使張從恩等將兵合諸將之師屯於邢州時德
光之衆已及魏府建牙於元氏從恩等引軍而退其
月又陷祁州刺史沈斌死之至三月德光退杜重威
等率兵攻契丹之泰州下之迴及揚州爲德光精騎
所圍諸將等決力死戰德光大敗至三年八月契丹
所部瀛州刺史僞言納款少帝復命杜重威等率大
軍迎降至十一月迴及鎮州之東垣度與番相遇十

二月六日遣前鋒奪橋爲番軍所敗其月十日杜重威等以軍降於德光命相州節度使張彥澤率漢騎二千先入京城至明年正月一日德光自將大軍至京北百寮素服班於野次匍伏請罪皆命釋之尋降投少帝檢校太尉負義侯令挈其族及將相近臣等於契丹黃龍府安置二月德光降僞赦改國號大遼稱會同十年升鎮州爲中京以燕王趙延壽爲大丞相中京留守三月德光自京率衆北歸至四月十八日死於樂城其年五月宣遺制以永康王兀欲襲其

僞位永康王者東丹王突欲之長子兀欲自以猶子不當嗣位且不奉祖母之命其諸部首領素畏述律氏之酷法復以阿保機死於渤海國被殺者百人今德光沒于漢地慮必獲罪如前同謀以其月二十一日領部族歸國述律氏歸於石橋番中地名其衆悉降於兀欲命送述律氏於阿保機明殿以幽之阿保機陵寢謂之明殿僞改會同十年爲天祿元年自稱天授皇帝漢乾祐三年十一月兀欲率騎數萬南寇陷邢州之內邱縣深州之就陽縣

周廣順元年正月太祖命左千牛衛將軍朱憲往修和好兀欲亦遣使裹骨支報命獻良馬四疋太祖復命尙書左丞田敏供奉官蔣光遂銜命往聘至其年四月敏等迴兀欲遣使實六獻碧玉金鍍銀裹鞍轡并馬四十匹其月太祖又命左金吾將軍姚漢英右神武將軍華光裔往使至其年九月兀欲爲部下太寧王偉王子燕王述軋所殺述律德光之子勒所部誅太寧王述軋述律自立號天順皇帝改名璟僞稱應歷元年

顯德元年春太原劉崇將圖南寇述律氏番將楊衮率虜騎萬餘以助之三月世宗親征與崇戰於潞州高平縣之南原崇軍大敗番衆棄甲而遁二年三月命許州節度使王彥超等築壘於李晏口與番兵數千騎戰於安平縣之南敗之

黨項羌

黨項羌古析枝之地漢西羌之別種其地東至松州南接春桑迷桑諸羌北連吐谷渾處山谷間亘三千餘里種有數姓自爲部落一姓之中復分爲小部

落有細封氏費聽氏析氏野利氏拓拔氏最爲強族
俗皆土著居有棟宇織毛罽以覆之其人多壽或至
百五六十歲不事生業好爲盜竊前世或來朝貢自
唐寶應正元之後皆率部族內附居慶州號東山部
落居夏州號平夏部落會昌初命三使以統之在寧
延州
界者命侍御史崔彥邠會主之在夏州者命侍御史
李主之在靈武麟勝州者命侍御史鄭賀主之
後唐同光二年二月遣使朝貢十二月其首領簿備
香來貢良馬

天成二年九月河西羗項如連山等來朝貢進馬四

十疋

四年四月勅沿邊置場買馬不許蕃部至闕下自上
御極已來黨項之衆競赴都下賣馬常賜食於禁廷
醉則連袂歌其土風凡將到馬無驚良並云上進國
家雖約其價直以給之然計其館給賜賚每年不下
五六十萬貫大臣以爲耗蠹中原無甚於此因降勅
止之雖有是命竟不能行其年九月首領折遇明等
來貢方物十月首領來有行來朝進馬四十疋上御
中興殿閱所進馬樞密使安重誨奏曰吐渾黨項近

日相次進馬皆給價直對見之時別賜繒帛計其所費不啻倍價請止之以爲國家常苦馬不足每差綱收市今番言自來何費之有外番朝貢中國錫賜朝廷常事不以自止 番部羊馬不絕於路

長興元年正月其首領來朝貢授萬德懷化司戈其年十二月以黨項折家族五顛都知兵馬使折之正爲檢校尚書右僕射簿備家族都督簿備撒羅檢校工部尚書

二年正月首領折七移等進馳馬其年十二月又遣首領來獻所奪得契丹旗號並馬等

三年正月以西路黨項部族劫掠使臣及外域進奉命邠州節度使藥彥稠靈武節度使康福等率步騎七千往方渠顛已來討其叛命者其年二月行營邠州節度使藥彥稠等奏誅黨項阿埋三族韋悉褒勒疆賴埋厮骨尾屈悉保等十七族七百餘人又率兵自牛兒族入白魚谷追及背叛黨項白馬慮家六族客戶三族獲大首領連香八薩王都統悉邨埋摩侍御乞埋鬼悉逋等六人兼黨類二千餘人獲持馬牛

羊數千計至晚師還野次其地無水軍士方渴俄有風雲自東而起是夜初夏降雪一尺軍中以為神助上令告捷使史萬山宣諭軍中所獲牛羊等物各令士卒自取勿得收斂以進奉為名

周廣順二年六月以府州黨項泥也六族防禦使歸化將軍泥香王子又泥也大首領拓拔山並為歸德將軍

三年二月慶州刺史郭彥欽奏黨項野雞族掠奪商旅請出兵討之時彥欽贖貨嗜其利以州地野雞族多羊馬作法擾之番情獷悍屢不從順乃誣奏之太祖遣中使齎詔撫安部族既苦彥欽虐政不時報命遂詔邠州節度使折從阮合寧州刺史張建武兵進討之建武勇于立功徑趨野雞族追擊殺數十百人

有喜王族折思族殺牛族彼無猜貳聞官軍討伐竟來餉餽官軍利其財貨皆劫掠之諸族乃相聚官軍至包山負險之地逆戰敗之投崖谷死者甚衆折從阮保兵而退太祖怒彥欽勒歸私第左遷建武為率府率命前解州刺史鄭元昭為慶州刺史以招撫之

于闐

于闐在京師西九千九百餘里西南帶葱嶺與婆羅門相接去三千餘里南與吐番接西北至疎勒國二千餘里國城之東有白玉河西有綠玉河次西有烏河其源同出於崑岡山去于闐西一千三百餘里每歲至七八月小水之後取玉於河謂之撈玉官取之後方許私取禁令甚嚴地多蒲萄醞而爲酒味極醇美其俗好事祇神唐正觀中其王伏闐信來朝復遣子入宿衛其後亦時來朝貢

晉天福三年九月其王李聖文遣使馬繼榮進白玉白氍毹牛尾紅鹽鬱金袖砂大鵬砂玉裝鞞轡等物其年十月冊聖文爲大寶于闐國王命供奉官張臣鄴爲國信使仍授入朝使馬繼榮爲鎮國大將軍扶風郡開國公食邑二千戶副使黃門將軍張載通試衛尉卿殿頭承旨通事舍人吳順規試將作監漢乾祐元年五月復遣使朝貢六月以入朝使王知鐸爲檢校司空副使張文達判官秦元寶爲檢校左右僕射監使劉行立檢校兵部尙書

奚厥

奚厥之始前書載之備矣自號可汗猶古之單于妻號可賀敦猶古之闕氏也子弟謂之特勒別部領兵者皆謂之設其大官屈律啜次阿婆次頡利法次吐毛次俟斤並代居其官而無員數父兄死則子弟襲其位北番之中最爲強盛至唐室末爲諸番所侵部族微弱亦嘗來朝貢

後唐天成二年正月其首領張慕晉朝貢

長興二年正月其首領杜阿熱來朝貢

晉天福六年七月其首領遣使薛同海已下一十七人來朝貢

五代會要卷二十九終

五代會要卷三十

宋

王

溥

撰

吐番

吐番在長安西八千里本漢西羗之地其種落莫知所出或云南涼禿髮利鹿孤之後其子孫以禿髮爲國號語託訛謂之吐番國人號其王爲普贊置大論小論以統理國事無文紀刻木爲約其國王與臣下一年一小盟三年一大盟其俗隨畜牧不常其居然亦有城郭都城號邏些城屋皆平頭貴人處於大毡

帳謂之排盧不知節候以麥熟為歲首唐貞觀中常來朝貢自後吞併諸番兵力日盛屢為邊患河西隴右之地悉為所取至大中初其國亂朝廷復得六關之地至唐室末又為侵據

唐分天下為十道河西隴右三十三州涼州最為大鎮土地沃壤人物繁庶開元天寶中置八監牧馬三十萬雜畜稱是其西復置安西都護府拒長安八千里羈縻河番三十國軍鎮監務大小三百餘戍守之兵皆取涼州節度及安祿山犯闕肅宗在靈武盡召西河戍卒收復兩京吐番乘虛遂取西涼隴華人百萬陷于臚腥開成之際朝廷遣使還番過涼肅瓜沙城邑如故華人見漢旌使夾道泣訴問皇帝還念陷番生靈否當時已經再世雖語言小訛而衣服未改至今涼州漢戶猶稱上代是鄯州

戍卒每帥守關則請命于朝廷

梁開平二年正月遣使朝貢二月以吐番入朝使嗚未首領杜論悉伽杜論心為左領軍衛將軍同正嗚未蘇論乞祿為右領軍衛將軍同正

乾化元年十一月又遣使來朝朝對於朝元殿賜金帛等遣之

後唐天成二年十一月遣使野利延孫等入貢并番僧四人持番書二封人莫識其字

二年正月以入朝使野利延孫等六人並為歸德將軍其年九月又遣使朝貢以入朝使閻薛羅等三人



並爲歸德司戈十二月又以入朝使薛竭薛王子撥
邇爲歸德郎將首領十人並爲歸化司戈

四年九月西涼府番官播心等來朝十月首領撥里
忙布蘭邇等來朝並投歸德司戈

長興三年二月又遣使朝貢三月以朝貢使左廂首
領野利閻心爲歸德大將軍右廂首領錢心爲歸化
郎將軍中廂首領李讀等並爲歸德司侯重云都督
對兒六突兒雞等並爲歸德司陞其年七月復遣使
入朝引對於端明殿問本番牙帳去京師遠近對曰
在涇州西二千里

四年十一月遣使來貢召對於內殿賜以金帛仍各
賜虎皮一張

晉天福四年十月罷延族大首領聶褒郎彝磨標昌
訶尤羅祇褒等率其屬朝貢

周廣順二年九月河西節度使申師摩奏吐番首領
折逋支等請加恩命其月勅以吐番左廂押番副使
折逋枝右廂崔虎心並授銀青光祿大夫檢校工部
尚書楊妃谷大首領沈念般授懷化大將軍左廂大

首領錢千閔篤爲歸德大將軍沒林葛于凝盧伴瀘
折連窮羅並爲懷化大將軍右廂大首領鹿悉迦阿
羅岳騷奴並爲歸德大將軍沈念般牝與龍文溫光
積並爲懷化大將軍中廂首領岳阿西安九十並爲
懷化大將軍又奏自涇州安國鎮至西涼府沿路三
處控扼各立州名欲補大首領爲刺史又管邊界部
落大首領三十餘人各賜空名告身並從之

高麗

高麗本扶餘之別種其國都平壤城卽漢樂浪郡之
故地在京師東五千一百里東渡海至於新羅西北
渡遼水至于營州南渡海至于百濟北至靺鞨東西
三千一百里南北一千里其官大者號大對盧比一
品總知國事三年一代若稱職者不拘年限對盧已
下官總十二級置外州縣六十餘大城置僣薩一人
比都督小城置通使一人比刺史其下各有僚佐分
曹掌事其王以白羅爲冠白皮小帶咸以金飾其俗
多淫祀事靈星可汗箕子等神國城東有大隧名曰
隧神常以十月王自祭之俗好經書至于庶賤之家

各有衢路造大屋謂之局堂子孫晝夜讀書習射前
王姓高氏世通中國常遣使朝貢

後唐同光三年十一月遣使廣平侍郎上柱國韓申
一副使春部少卿朴巖來貢方物至四年正月授韓
申一朝散大夫試殿中監樸巖朝散郎試祕書郎

天成四年八月復遣廣平侍郎張玢等五十二人來
朝貢銀香獅子銀鑪金裝釵鏤雲興_星刀劍馬匹金銀
鷹繚鞴白紵白毡頭髮人參香油銀鏤剪刀鉗釵松
子等

長興三年二月復遣使大相王儒來朝其年六月權
知國事王建爲特進檢校太保使持節 元菟州都
督充大義軍使兼御史大夫上柱國高麗國王七月
又以其妻柳氏爲河東郡夫人

清泰二年十二月遣使禮賓卿邢順等來朝貢
三年正月以入朝使禮賓卿邢順試將作少監副使
崔遠試少府監主簿其年又遣使王子太祖王規等
來貢方物以太祖王規爲檢校尙書右僕射副使廣
平侍郎崔禹試將作監其隨行節級等三十餘人並

授司戈司陸等職

晉天福三年八月清州奏高麗國宿衛質子王仁翟乞放歸鄉里從之

四年九月復遣廣平侍郎邢順等七十二人來貢方物

六年八月其國王建爲開府儀同三司檢校太師使持節元菟州都督充大義軍使高麗國王命國子博士謝攀持節就冊之

八年復遣 予大相王甲 等來

開運元年正月以入朝使王子大相守倉部令上柱國賜紫金魚袋王甲一爲檢校尙書右僕射正朝守廣平侍郎柱國丹金魚袋柳迥酬檢校禮部尙書守廣平郎中韓李康試衛尉卿守廣平郎中樸元信試太府少卿守兵部主事韋安試將作監主簿以進奉賀登極使正朝前守廣平侍郎柱國丹金魚袋金仁逢可檢校工部尙書副使禮賓卿柱國丹金魚袋金裕可試大府卿判官兵部郎中張規可試衛尉少卿二年其國王王建卒其子武嗣位十月遣使廣平侍

郎朝立珪副使前禮賓卿金廉等一十八人來朝十
二月以權知高麗國事王武爲特進檢校太保使持
節元菟州都督充大義軍使兼御史大夫高麗國王
仍命光祿卿范光政太子洗馬張李凝就行冊命
王武者王建之子本國中大族國中推而爲主有智
勇兵力日盛以兵并三韓百濟之地東夷君長最爲
雄盛漢乾祐末王武死其子王昭代立

周廣順元年正月遣廣平侍郎徐逢等九十七人來
朝貢二月以權知高麗國事王昭爲特進檢校太保
使持節元菟州都督充大義軍使兼御史大夫高麗
國王仍命衛尉卿劉皞通事舍人顧彥浦持節冊之
劉皞尋卒於路顧彥浦溺海而死

二年九月復以太僕少卿 演借衛尉卿充高麗國
冊禮使右衛率府呂繼贇借將作少監充副使

顯德二年十月復遣使王子大相王融來貢方物又
遣廣平侍郎荀質來賀登極其年十二月授其國王
王昭開府儀同三司檢校太師高麗國王

五年六月命尙書水部員外郎韓彥卿尙輦奉御金

彦英卿使於高麗因命賚帛數千匹就彼市銅以備鑄錢之用

六年正月又遣其臣王子佐丞王兢佐伊王甫魏光等貢名馬織成衣襖弓劍等其年八月遣使進別序

孝經一卷越王孝經新義八卷皇靈孝經一卷孝經

雌圖三卷

別序者記孔子所生及弟子從學之事新義者以越王為問目以什釋文之是非非皇

靈者止說延年辟災之事及志符文乃道書也雌圖者止說月之環暈星之孳孳乃識緯之書也其

年十一月遣使貢銅五萬斤紫白水精各二千顆

渤海

渤海靺鞨本高麗種唐總章中高宗平高麗徙其人

散居中國置州縣于遼外就平壤城置安東都護府

以統之至萬歲通天中契丹李榮反攻陷營府有高

麗別種大舍利乞乞仲象

大姓舍利官乞乞仲象名也

與靺鞨反

人乞四比羽走保遼東分王高麗故地則天封乞四

比羽許國公大舍利乞乞仲象震國公乞四比羽不

受命則天命將軍李楷固臨陳斬之時乞乞仲象已

死其子大祚榮繼立併有比羽之眾勝兵丁戶四十

餘萬保據挹婁故地至聖歷中稱臣朝貢中宗命侍

五代會要 卷三
御史張行岌就往宣慰號其都爲忽汗州以祚榮爲
忽汗州都督封渤海郡王國自稱渤海其俗呼其王
爲可毒失對面呼聖王牋表呼基下父母老王曰大
妃妻曰貴妃長子曰副王諸子曰王子代以爲大會
長終唐室朝貢不絕

梁開平元年五月其王大諲譔遣王子大昭順來貢
方物至二年又遣殿中少令崔禮光來朝

三年三月遣其相大誠諤來朝兼貢女口

乾化二年五月又遣王子大光贊來朝貢方物太祖

厚有錫賜

後唐同光二年正月遣王子大禹謨來朝五月又遣
王子大元讓來朝莊宗賜金綵以遣之八月又遣姪
學堂親衛大元謙試國子監丞

三年二月又遣使裴球貢方物進細女口五月以入
朝使政堂省守和部少卿賜紫金魚袋裴球爲右贊
善大夫

天成元年四月遣使大陳林等一百十六人來朝貢
進男口女口各三人并人參昆布白附子等其年七

五代會要 卷三十一 九 信州府志
月遣使大照佐等六人朝貢先是契丹大首領邪律
阿保機兵力雄盛東北諸番多臣屬之以渤海國王
土地相接常有吞併之志是歲率諸番部落攻渤海
扶餘城下之改扶餘爲東丹府命其子突欲留兵鎮
之未幾阿保機死渤海命其弟率兵攻扶餘城不能
克保衆而退

四年五月又遣高正訶入朝貢方物七月以正訶爲
太子洗馬

長興二年十二月遣使成文角來朝

三年正月又遣使來朝貢

四年七月以先入朝使成文角爲朝散大夫右神武
軍長史奏事右錄事試大理評事高保又爲朝散郎
右驍衛長史並賜金紫

清泰二年十二月遣使列周道等入朝貢方物

三年二月以入朝使南海府都督列周道爲檢校工
部尚書政堂省工部卿烏濟顯試光祿卿

周顯德元年七月渤海國崔烏斯多等三十人歸化

新羅

新羅弁韓之苗裔其國在漢樂浪郡之地南東俱限
大海西接百濟南隣高麗東西千里南北二千里有
城邑村落其王所居曰金城周七八里衛兵三千人
文武官凡十七等風俗刑法與高麗等同而朝服尙
白人多金朴兩姓俗重元日相慶賀以是日拜日月
之神婦人以髮繞頭用綵及珠爲飾髮甚鬢美其王
金真唐武德四年封樂浪郡王龍朔三年又以國爲
雞林州授其王雞林州都督世以金氏爲會長朝貢
不絕

後唐同光元年十一月其王金朴英遣倉部侍郎金
樂錄事參軍金幼卿來朝貢

二年六月又遣使朝散大夫倉部侍郎賜紫金岳來
朝貢授金岳朝議大夫試衛尉卿

天成二年二月遣使張芬等來朝其年三月以新羅
國權知康州事王逢規爲懷化大將軍新羅國前登
州都督府長史張希巖新羅金州知後官本國金州
司馬李彥謨並檢校右散騎常侍其月又以入朝使
中散大夫兵部侍郎兼賜紫金魚袋張芬爲檢校工

五代會要 卷三十一
部尚書副使兵部郎中朴述洪兼御史中丞判官倉部員外郎李忠式兼御史其年四月新羅國康州遣使林彥來朝貢召對於中興殿賜物有差

四年二月青州奏於登州岸獲新羅船一隻進其寶貨

長興二年四月權知國事金簿遣使金朮來貢方物
清泰二年二月以入朝使執事侍郎金朮爲檢校工部尚書副使司賓大卿李儒試將作少監

黑水靺鞨

靺鞨蓋肅慎之地後魏爲勿吉在京師東北六千餘里東至於海西接奚厥南界高麗北鄰室韋其國凡爲數十部各有酋帥而黑水靺鞨最處北方尤矜勁健俗皆編髮性凶悍無憂戚貴壯而賤老俗無文字兵器有角弓楛矢唐開元十年三月安東郡都督薛泰於黑水靺鞨內置黑水郡以最大部落爲黑水府以其首領爲都督仍置黑水府長史一員部落監領之

後唐同光二年九月遣使兀兒來朝以兀兒爲懷化

中郎將遣還番

三年五月黑水胡獨鹿遣使朝貢

天成四年八月遣使骨至來朝兼貢方物以骨至為歸德司戈遣還番

長興元年三月其首領兀兒復遣使朝貢

二年五月青州奏黑水兀兒部至登州賣馬

三年二月青州奏黑水桃李花狀申父胡獨鹿卒所有敕賜朱記未敢行使

南詔蠻

南詔蠻本烏蠻之別種在漢永昌之東姚州之西蠻

俗謂王曰詔其先渠帥有六故號六詔各有君長不

相統攝唐時中亦時來朝貢

後唐同光三年閏十二月魏王繼岌奏遣使賚書詔

諭南詔蠻

時初平蜀川乃募曾使南詔者有泰州副使徐藹詣雲南苴羊城路且云唐中和年

僖宗在蜀命嗣王龜年使雲南藹季父為副使藹為判官時不到咀羊城祇達善闡迴約為甥舅許降安化公主雲南使來迎公主便次服收復長安黃巢東走乃託以他歲而止

天成元年十月供奉官李彥楷高品李光裕雲南使

迴山後兩林百蠻都鬼主右武衛大將軍李卑晚差

大鬼主傳能阿花等來朝貢明宗御文明殿引對百
官稱賀時李卑晚爲寧遠將軍大渡河南山前邛州
六姓都鬼主懷安郡王勿定標沙爲定遠將軍

二年七月以左金吾衛將軍烏昭遠爲左衛上將軍
入蠻國信使其年九月西川奏摠黎州狀申雲南使
趙和於大渡河南起舍一間留信物十五籠并雜詩

一卷遞至闕下

初郭崇韜平蜀之後得王衍昔獲俘
數千以天子命命使人人其部被止

于界上在國信與蠻俘得往續有轉牒稱都督爽大
即長國宰相布爽等上大人唐皇帝男奏疏一封自
驛拓歷至幾美白崖爽等又入弄棟演習白鸚鵡邵
膳裔爽等又入平夷新安寧遠標沙差人轉送黎州

其紙厚硬如皮筆力尤健有詔本設有督爽弛着忍
爽王保王寶督彌勒君爽董德義督爽長垣忍爽緯
楊布爽所署有彩牋一軸轉韻詩一章章三韻其一
聯有類擊筑詞頗有思本朝如親之義理亦不遜其
籠中卽返其國信舊封猶存復命
左衛上將軍烏昭遠往皆不能去

牂牁蠻

牂牁蠻其地北去兖州一百五十里東至辰州二千
四百里南至交州一千五百里西至昆明九百里無
城郭散居村落多霖雨稻皆再熟無徭役唯征戰之
時乃相屯聚刻木爲契其法劫盜者三倍還贓殺人
者出牛馬三十頭乃得贖死首領姓謝氏唐室頻遣

使朝貢

後唐天成二年八月牂牁青州八郡刺史宋朝化等一百五十人來朝貢進草豆穀二萬顆硃砂五百兩黃蠟二百斤各賜官誥金帛遣之

昆明國

昆明部落在黔州西南三千里山路險阻住止高欄亦有羊馬其俗椎髻跣足酋長披虎皮下者毡後唐天成二年八月昆明大鬼主羅殿王普露靜王九部落各差使等隨牂牁來朝貢

占城國

占城國在中國西南其地東西一百里南北三千里東暨海西暨雲南南暨真臘國北暨驩州界東北至兩浙海行一月程其衣服制度大畧與大食國同所乘皆象馬粒食稻米肉食水兕山羊之類獸之奇者有犀牛鳥之珍者有孔雀前世多不與中國通周顯德五年九月其國王因德漫遣其臣甫阿散等來貢方物中有灑衣薔薇水一十五瓶言出自西域凡水之霑衣香而不黧又貢猛火油八十四琉璃瓶

引對於內殿賜以冠帶衣服等其表文以貝多葉檢以香木函其年十一月入朝使甫阿散金姿叵羅辭各賜繒帛有差仍命齎金銀器一千兩繒絲一千疋細甲名馬銀鞍勒等就賜其國王

雜錄

後唐天成元年六月十日御史臺奏伏觀今月三日入閣班退後方引對朝貢番使竊觀近制頗失常儀且月華門是宰相兩省近侍官常朝來往之所外國番國朝見不合出 此門而又殿廷班序先後

列其百辟示彼四夷俾觀多士之羽儀以顯九重之嚴重豈可衆官退後番客方來合自正門直趨丹陛此是向來事例今辰忽有更張竊以方屬中興宜循舊典伏乞宣付中書門下重令參詳永爲定制奉敕宜令太常禮院檢舊例申奏者右太常禮院奏臣謹按開元禮以賓禮待番客有六一番國王來朝二戒番王見日三番王奉見四受番使表及幣五宴番國王六讌番國使從開元定禮之後本朝故事對諸番客又並於內殿引對其殿名曰參殿事在禮賓使客

省使不下外諸司見今施行不一今例惟迴鶻番使則正殿引對况迴鶻見居甘州其地尤屬河西道涼州所管每遣使進表幣待以賓禮皇帝御正殿列百官陳盛儀酌禮沿情事恐太重伏請今後准諸番客例祇於內殿引對不臨正朝兼免乖越又符故事謹具詳酌如前奉敕四夷來王歷代故事前後各因強弱撫制互有典儀大番頒示於威容則於正衙引對小番但推其恩信乃於內殿撫懷憲府奏論禮院詳酌皆徵故事咸有明文正衙威容未可全廢內殿恩澤且宜常行若遇大番入朝卽准舊儀於正殿鋪陳立仗百官排班於正門引入對見

四年二月敕沿邊置場買馬不許番部至闕下

周廣順三年三月詔禁沿邊州城陳兵仗於諸番部

五代會要卷三十終

五代會要
卷三
七
信

跋

本朝故相王公溥撰唐及五代會要凡當時制度
沿革粲然條陳無遺唐會要已鏤板於吳而五代
會要未甚傳彥博家藏善本比至蜀請官參用正
史考覈訛謬且刻以傳慶歷六年四月望日樞密
直學士尚書吏部員外郎知益州事充益利路兵
馬鈐轄文彥博題

國朝王文康公所纂五代會要三十卷慶歷中文
忠烈公帥蜀常刻行之兵興已後又軼其傳元之

卷三
七
信

假守信安得舊板於江陰以來因併與范魯公所
 著五代通刻板寘郡五季之事陋矣亡足云者
 然而前承唐餘後訖宋興其間五六十載儀物章
 程官名文法因革損益之由使後世有考者多見
 此書其可廢乎昔孔子之杞宋得夏時坤乾而取
 之以其近于用也是亦學士大夫之所宜知也乾
 道七年三月旦日左宣教郎權發遣衢州軍州主
 管學士兼內勸農事施元之書

